

Bunita proyecto unda mucha, hoben y adulto a participa:

“Tempo pa Click” a haya espacio na Biblioteca Nacional



Dialuna cu a pasa, pa 6'or di atardi na Biblioteca Nacional na Madurostraat, a tuma lugar e apertura di e exposicion asina interesante: “Tempo pa Click”.

E evento a cuminsa cu cantamento di Himno di Aruba door di tur presente, na cappella. Cada grupo di a haya oportunidad di hiba palabra.

E exposicion aki a nace como un proyecto Fundacion Rancho, y ta remarcable e talento cu habitantenan di e area, adulto y hoben, a desplega den dje.

Presidente di e fundacion sr. Clifford Rosa a muestra masha

contento y gradici, y el a expresa palabranan di danki pa CEDEAruba pa su aporte, sin cual e expo aki lo no por a tuma lugar, segun sr. Rosa a indica. Un danki special a duna na e boluntarionan cu a yuda draai e proyecto.

Tambe el a gradici Biblioteca Nacional pa a otorga nan un espacio amplio pa e exposicion aki.

Esaki ta e prome biaha cu e exposicion interesante aki ta sali for di Rancho. Na 2015 a tene e prome exposicion den Rancho mes, na Museo Arkeologico. E participantenan, entre hoben y adultonan, a saca masha bunita potret di henter e area di Rancho, mustrandu e lugar su valor.

Sr. Clifford Rosa a splica cu cada potret tin su seyo y significacion, pasobra a purba di instrui nan na tal manera cu nan por a duna un titulo na nan respectivo potret y un descripcion di

nan pensamiento, pa ilustra e potret.

Aki por a mira cu e muchanan tin un manera pa expresa nan mes, mescos e teenagers, y otro manera di e adultonan.

E proyecto aki tabata tin un duracion di seis siman, dos pa cada grupo, y esey a resulta den bunita exposicion aki.

E expo lo keda habri te cu 29 di Januari, pues incluyendo Dia di Betico. Sin duda bal la pena pa for di awor e publico por pasa admira e exposicion aki, den horanan laboral di BNA, na Madurostraat. Riba potret un par di e obranan fotografico y sr. Clifford hopi orguyoso hunto cu algun di e participantenan. Un di e adultonan cu ta docente na Universidad di Aruba a pone un poema hopi amplio na su potret, pasobra el a mira e importancia di e proyecto no como persona di Rancho, sino como docente riba tereno social na U.A.